

國史列傳

滿漢大臣列傳

卷六十五

韓 鏐

康基田

畢 沅

陳用敷

韓鏐貴州畢節人由貢生捐納通判乾隆二十三年揀發山東河工二十六年授東昌府上河通判三十二年遷沂河同知三十五年調河南黃沁同知三十八年擢安徽潁州府知府四十年擢江南淮徐道四十六年正月授河東河道總督三月請於時和驛大隄外自祥符縣丞汛二十二堡起至八堡大壩西尾止築圈堤一千六百五十丈

上從之閏五月奏言東省運河之水全賴汶泗來源及各湖接濟必須隨時蓄洩得宜查汶河上游東平州戴村石壩等處民堰河勢頂衝其對岸停淤積沙挺入河心應將淤灘切嘴挑溝以展河勢泗河下游卽爲府河由安居十里二斗門入運河身淺窄民堰卑矮亦應籌辦蜀山馬踏馬場南旺等湖隄外積水取土維艱現在三進重運已行正開湖洩水之時堰根顯露卽可起湖邊灘土以培隄堰報

聞七月豫省萬錦灘黑岡俱長水丈餘八堡迤東焦橋一帶大隄被刷三十餘丈鑠請嚴加治罪

諭曰此次河水漫溢實屬洶湧但大溜仍走中路圈隄大壩已露出灘面韓鑠富勒渾聞信後卽親赴該處督率搶護辦理尙屬無過所請治罪之處尙可寬免惟現屆秋汛務須加意防護趕緊辦理以期工程鞏固尋奏祥符焦橋漫灘水已斷流補築圈隄十日內卽可完竣

上以鑠等率同在工大小各員集事迅速頗爲奮勉

命交部議敘旋以儀封北岸曲家樓刷坍隄工二十餘丈復自五堡至九堡又間段漫溢三處

諭曰該處隄工場卸漫水東西分流俱在運河關係匪細亟須催集夫料星夜堵築俾口門不致刷深則收功尤易時大河水勢陡長溜勢全歸孔家莊水面約寬百餘丈下注曲家樓漫口隄工續塌二十餘丈

上命河南巡撫富勒渾赴工會辦又

諭曰曲家樓漫口在黃河北岸切近運河關係漕運最爲緊要

著韓鏐等勘明覆奏一面動工辦理復

命江南河道總督李奉翰赴工次與之督率趕築嗣鏐偕富勒渾奏言惟青龍崗大李家莊及孔家莊三處灘勢最低河水匯注高與灘平灘面俱係新淤現卽趕緊興工報

聞又

命大學士阿桂於江南讞案回京時就近往勘尋奏青龍崗灘面又塌寬七十餘丈水深一丈四五尺而孔家莊等三處溝槽俱已掛口斷流

諭曰孔家莊漫口已移改於青龍崗韓鏐等自應督飭員弁趕緊鑲護俾早完一日卽百姓早受一日之益旋

命山東巡撫國泰赴工會同堵築八月河水漸落歸槽子堰亦俱墊竣惟正河斷流淤墊較高

諭曰昨據阿桂等奏壩工合龍後仍復墊陷業經令設法籌辦矣至嵇璜所奏令河北流仍歸山東故道之語現在漫口下注北流之水祇有二分南下者至八分之多斷難迴狂瀾使之北注朕料必不可行阿桂與李奉翰韓鏐等目擊全河形勢令各

就所見據實覆奏尋錄奏言青龍崗始漫之時勢甚洶湧是以到漾北行分入沙趙二河穿運歸海者不過二分北行未久旋即斷流全行南注其南北地勢高下顯然若干南行極窪之處建隄堵截欲迴狂瀾於北注誠如

聖諭必不能行且黃河大勢河底雖漸淤高而自豫省達江南入海終屬就下之勢未便輕議更張

諭曰地勢北高南下顯而易見但北流二分既經斷流韓錄國泰自應於斷流時即查明具奏以便籌辦至此時始行奏聞疎忽太甚四十七年正月開放引河大溜已分掣三四分金門水力亦減尋東壩忽又陡墊錄等自請嚴議

諭曰東壩中間裂縫以致壩頭塌失則工程究未穩固此人事未盡不得諉於事勢之無可如何阿桂等須靜鎮妥辦以期必成現聞黃河以南運道深通而北河運道未免淤墊正屆重運北上不可無大員經理令韓錄往微山湖北運河查勘相機妥辦較爲有益其請交部議處正可不必二月赴濟寧會同國泰及巡漕御史毓奇查勘運道自濟寧汛在城閘下起至嶧汛黃

林莊止分別做土堰柴壩及椿埽橋梁設立水站置備絞關並請于勘辦事竣即赴工次

上以壩工合龍尙需時日東省運河關係緊要

命鑠仍往來東省隨時相機妥辦並

命毓奇幫同妥商嗣鑠逐勘伊家河荊山橋等處水勢復聞青龍崗東壩頭蟄塌恐運河不能容納急籌分洩之路因道出江南銅山縣潘家屯其地外灘高大河底七八尺及一丈二三尺不等請就河底估挑並再行抽溝洩水則下游益就寬深

上從之尋鑠復回工次會勘時東壩已塌失三次遂與阿桂等議將挑水壩改築大壩並於大壩後接築土壩三月復赴潘家屯會同薩載挑濬路馬湖六塘河等處並汶泗兩河四月漫口合龍後又塌三十餘丈

命鑠廣籌宣洩隨濬開潘家屯引河並於濟寧以北徒駭馬頰各支河濟寧以南伊家河等處復勘估展寬旋

命仍回青龍崗工次協同阿桂籌辦物料及堵築事宜尋阿桂等議於蘭陽三堡改築大隄開挑引渠導水進內從商邱七堡

出隄歸入正河故道

上敕交大學士九卿議行五月鑠丁父憂四十八年三月青龍崗合龍四十九年服闋授工部右侍郎五十年三月鑠因任內河督時應賠銀十四萬餘兩

上以銀兩較多免其十分之七六月丁母憂五十二年服闋仍授工部右侍郎轉左侍郎五十四年六月因江西湖廣糧船於鳳凰灘及漢口阻滯

命偕倉場侍郎蘇凌阿馳往查勘尋奏江西糧船因給發運費銀兩遲延湖廣糧船因帶臬司李天培木植致有遲滯

上命將兩江總督書麟江西巡撫何裕城交部嚴議並

命大學士阿桂赴湖北會同巡撫畢沅嚴鞫李天培九月

命偕工部尚書金簡倉場侍郎蘇凌阿劉秉恬會勘通惠溫榆二河及朝陽門外護城河挑濬各工十月調戶部右侍郎五十五年二月

命同刑部右侍郎玉德赴湖北審辦廣濟縣民人楊隆霏赴京控冊書陳見龍重征勒折案鞫虛論罪如律五月

命往江南會同南河河道總督蘭第錫辦理河工防汛事宜六月因黃水驟長漫過毛城鋪滾壩等處尋毛城鋪裹頭壩尾補築完竣王平莊民堰漫缺進水之處亦漸堵閉並於碭山一帶大堤酌做挑水壩草壩一律穩固

諭曰補築埽壩必須堅實完固不可稍有疎懈十月江南民人湯乾學以河工利弊十三款由步軍統領衙門呈奏

上命鑾同兩江總督孫士毅江南河道總督蘭第錫河東河道總督李奉翰按款核查俱無確據論罪如律十一月南河總督蘭第錫以高家堰風損石土段落較多請築圈隄戽水以便確估

上以蘭第錫言未實命鑾偕兵部尚書慶桂往勘尋勘明無庸築隄戽水

上從之嘉慶三年調兵部右侍郎四年三月

命守護

裕陵初鑾寄籍順天大興縣後改歸原籍至是復奏准入順天籍六年二月

上以鏐年老有病命以原品休致九年卒子樹猷以府經歷緣事革職尋捐復原官孫開泰二品廕生戶部額外主事

康基田山西興縣人乾隆二十二年進士即用知縣二十三年補江蘇新陽縣知縣二十四年調昭文縣知縣三十一年陞廣東潮州府通判拿獲洋盜多名引

見得

旨以同知陞用三十二年丁母憂回籍三十五年服闋赴粵補雷州府同知三十八年陞廉州府知府四十年署惠潮嘉道四十一一年以嘉應州斬犯蔡老三臨刑未經殺死帶傷脫逃部議革職循例捐復四十三年授河南懷慶府知府四十四年調開封府知府四十八年擢河北道五十一年調江南淮徐道五十二年二月擢江蘇按察使

諭曰康基田由河南河北道調任江南淮徐道於河工事宜最爲諳習且辦事認真不辭勞瘁每年伏秋大汛時仍應令赴淮徐一帶幫辦修堵諸務庶於河工有裨六月河南睢州下汛十三堡隄工漫溢兩江總督李世傑檄基田馳往堵築工竣回任

五十三年擢江寧布政使仍兼管河務五十四年二月

命署江南河道總督三月奏高堰誌椿現存湖水四尺二寸束清壩口門收存十二丈禦黃壩收存十八丈此時黃水微長會清東注形勢甚順其玉皇閣引河頭微有淤墊量爲疏治將來開放必更暢順現在上下運河水勢深通糧船遄行無阻得旨欣慰覽之今年漕運大有起色又四月奏桃源廳北岸駱家營河勢坐灣正溜直射下壩伏秋大汛嚴堤着重今估築月堤以爲保障其唐家灣倒鉤引河上年過水淤墊應量爲疏濬將來毛城鋪過水可期暢洩又北岸茅家隄石礮前年鑿深六尺就其石底做成石閘於上下臥石尙有高凹不平之處再鑿去二三尺大汛時分洩通暢其天然閘非遇十分異漲可無用開放得

旨允行是月回本任六月基田防汛睢南適周家樓漫溢上游魏家莊第十七段挑溜大埽溜勢湧激將陷基田上埽搶鑲忽大溜直射將埽衝翻基田爲埽所壓撈救得生經兩江總督書麟江南河道總督蘭第錫奏入

諭康基田翻入河底爲埽所壓幸復沖起撈救得生著賞給大荷包一對小荷包兩對以示獎勵並賞給奶餅一匣五十五年二月

命護理安徽巡撫四月高郵州糧書夏館僞造印串事覺巡撫閱鶚元逮問

諭曰康基田身任藩司錢糧是其專責乃經巡撫批令嚴查轉移交臬司辦理推諉遲延竟至三月之久非袒護屬員即係迎合閱鶚元之意康基田亦先著革去頂戴暫留藩司之任基田覆奏自認遲悞仍不將瞻顧上司徇庇屬員實情直陳

上以基田竟無良心辜負委任厚恩難以從寬留任亦著革職拏問又因句容縣糧書江嵩年等侵挪錢糧漕米基田曾將知縣吳汾劾休巡撫閱鶚元延擱未辦

命與閱鶚元質對讞定發伊犁當差基田呈請繳銀贖罪得旨允行引

見發南河以同知用五十六年二月仍授淮徐道五十七年七月基田在蕭汛督搶埽工聞豐汛四堡曲家莊堤工過水卽馳

往先行裹護連夜集夫在灘面圈築越堰繞過缺口

諭曰此事深得康基田之力若非伊先行赶到圈築越堰恐漫口更致塌寬難以施力基田辦理甚屬可嘉應加以恩獎著賞給按察使職銜六十年五月擢江蘇按察使

諭曰康基田熟悉河務仍著幫辦河道事務十月調山東按察使兼管黃運兩河事務嘉慶元年六月南河豐汛六堡堤工漫溢七月

上命康基田前赴工所與蘇凌阿蘭第錫商酌妥辦並發圖樣交基田閱看尋陞山東布政使仍管東河事務

諭曰前因康基田熟悉河務曾令自行酌量如東省並無應辦之事速赴豐汛商辦要工今東省湖河諸務轉爲着重康基田竟當在東省與玉德實力妥辦疏消漫水撫卹災民務使湖身不致淤墊運道不致有礙基田奏伏閱圖樣漫口形勢誠如聖諭係迴溜倒漾進入溝槽於高家莊坐灣向東處所開引河東注以合正流則口門易於堵閉惟高家莊漫口已經兩日恐衝刷寬深漸奪溜勢則辦理稍費周章江南豐沛二縣與魚臺

金鄉接壤臣馳勘漫水下注與東省之微山等湖尙無妨礙但黃水日見增長不得不豫籌畫宣洩已將湖口壩啟放並將分洩湖水之伊家河趕緊開通至單縣在江南豐縣六堡之西因黃水倒漾村莊間被淹浸現有撫臣玉德馳往查辦臣卽遵旨馳往江南豐汛工次得

旨康基田熟悉河務今既往豐汛與蘇凌阿等面爲商辦自更得力康基田不可拘泥昨旨又回東省八月基田偕兩江總督蘇凌阿江南河道總督蘭第錫覆奏會勘豐汛漫口情形及籌辦堵築展寬引河各事宜時豐汛漫水漾入昭陽微山等湖穿入運河

命基田回至東省籌辦尋蘇凌阿奏請留工得

旨前因山東魚臺等各州縣被水有應行撫卹疏消各事基田係本省藩司是以令其回東辦理今伊江阿業經督率委員妥爲經理回空糧船毫無阻滯而豐汛漫口工程浩大尤關緊要自應仍令康基田在彼幫辦十一月豐汛壩工合龍交部從優議敘

命卽回山東本任嗣因凌水陡發壩身坐蟄

諭基田仍留工次會同蘭第錫將堵築事宜上緊趕辦二年二月奏豐汛壩工合龍穩固

諭曰基田係隔省派往之人籌辦一切均屬奮勉妥協著賞戴花翎交部議敘並賞給奶餅一匣卽回本任籌辦運河繙道及地方事宜七月擢江蘇巡撫兼管河南事務八月河東河道總督李奉翰奏江南碭山境內楊家壩無工之處漫溢七十餘丈溜勢掣至河南虞城已飛咨基田馳往搶辦得

旨康基田曾任淮徐河道該處情形皆其熟悉現又補放江蘇巡撫兼管河工地方呼應較靈著卽將該處漫口是否不致掣溜易於堵合比上年豐汛六堡漫口情形若何下游民田是否不致淹浸之處卽行加緊迅速奏聞復因山東曹縣二十五堡隄工漫溢

上命回至曹縣幫同堵築基田偕河東河道總督李奉翰山東巡撫伊江阿會奏築堵曹汛漫口情形上按圖指示

命基田相度情形斟酌辦理尋奏偕伊江阿山東布政使司馬
駒奏曹汛開挑引河築壩逼溜情形九月又奏曹工漫溢係在
白露之後比上年豐工情形稍輕現在兩省引河已經開工約
計十月底挑竣十一月初壩工即可合龍並報

聞授河東河道總督十一月

諭曰前據康基田等奏山東曹縣漫口工程十一月內可以合
龍今已屆十一月底尙未奏到朕心深爲盼望著傳諭康基田
等督率趕緊堵築竣事不得藉詞延宕並將日內曾否合龍之
處迅速馳奏以慰廑注尋奏口門僅二十九丈正擬開放引河
因嚴冬冰凍滿河洶凌恐一經啟放冰凌推擠槽內黃水不能
暢流壩身反致著重應暫緩啟放引河得

旨甚是不可欲速反遲十二月調江南河道總督曹汛漫口堵
築合龍奏入交部議敘三年二月曹汛壩工陡蟄自請交部嚴
議部議革職得

旨寬免三月

上以堵築遲緩

嚴飭之四月奏口門深已十一二丈壩頭時見蟄裂恐徒費工料擬在二壩迤前河勢坐灣向東處所開挑引河頭另築壩工一道卽以舊西壩留作挑水壩請俟秋後興工上責其疎玩遲延革去翎頂八月

諭曰從前江南山東兩省督撫總河俱在曹工而下游疏挑事宜無人經理以致引河不能通暢此次山東交界以下江南境內下游河道挑挖事宜專交康基田李奉翰督辦仍應測量水平務令下游一律寬深暢順俾成建瓴之勢若有梗阻高仰之處惟李奉翰康基田是問尋偕李奉翰奏自徐城至清口五百餘里大河刷滌順通南北兩岸之天然峯山等閘並唐家灣引河王營減壩先經堵截此次洩水入黃得收專力攻沙之益至東省交界於河底挑挖深溝先將積水放淨卽依水平較量估挑加深務期引河啟放時建瓴直下一舉告成得

旨覽奏欣慰九月河南睢州隄工溢水由渦濉等河潑洄而下亳州蒙城靈璧等縣間被淹浸基田奏曹工未合復有新工諭曰上游睢工衝塌大溜全掣南岸曹工漫口業經斷流卽可

堵合此實不幸中之幸乃摺內轉稱曹工未合復有新工措辦殊屬不合著傳旨申飭十月曹工大壩金門堵合四年正月睢工合龍全黃復歸故道江境引河一律通暢得

旨賞還翎頂二月奏豐碭南北兩岸凡有溝槽串水之處填築土格攔截不令水勢旁洩俾大溜全注正河併力攻沙溜湧水急新挑之河口刷寬深水已歸槽各工益固得

旨覽奏稍慰益當敬慎時有條奏黃河淤塞應治海口又有請復舊制混江龍者

上發交康基田司馬駒閱看基田奏治河之法首在束水攻沙嘉慶二年曹工漫溢當大汛盛漲溜或旁趨遂致正河淤墊因上決而下淤非先淤而後決現在睢工合龍曹工堵築臣悉心細查連年黃水漫衍所在停沙比至清江會淮已成清水是以海口刷滌計寬三百數十丈極爲寬暢條奏所稱疏濬海口應毋庸議其請仍用混江龍臣查混江龍助水之力甚微究不若束水攻沙以水治水之力大而功倍奏入

諭曰汝在河工多年深悉治河之法誠心妥辦從來有治人無